

東
華
續
錄

東華續錄

臣王先謙

臣周瀚蕃恭校

道光十一年辛卯春正月戊午 上以五旬萬壽詔開恩科於本

年八月十二年三月舉行鄉會試移正科鄉會試於十二年八月

十三年三月舉行○以履端錫美加恩宗親封儀親王孫奕劻爲

入八分輔國公慶郡王縣慤弟縣悌爲不入八分輔國公定親王

奕紹子載銓爲不入八分鎮國公命成郡王載銳在內廷行走賜

三眼花翎賜定親王奕紹金黃蟒袍惇親王縣愷惠郡王縣愉及

奕約銀有差○乙丑諭長齡奏遵旨審擬容安等罪名一摺前因

英吉沙爾喀什噶爾二城待援甚急容安統領伊犁官兵於九月

十二日全抵阿克蘇儘可趕緊由葉爾羌進發解圍乃遷延觀望

坐失機宜且先據奏明由大路進兵嗣復欲由和闐前往以有用之兵轉於無賊之處繞道行走以致耽延一月之久無謀無勇措置乖方並欲厚集兵力防守阿克蘇烏什再行前進身爲統兵大員不知緩急輕重任意延宕喪心昧良莫此爲甚當降旨將容安革職拏問嗣以此等怯懦無用之人不值如此辦理復諭長齡將容安解赴阿克蘇看守旋又數其四罪令長齡到彼後逐層嚴審按例定擬並將長清等分別擬罪茲據長齡審明容安等罪款定擬具奏容安坐擁重兵畏葸不前孤負國恩貽誤事機本應照軍法從事在阿克蘇卽行正法姑念見在二城之圍已解尙可寬其一綫容安著加恩照長齡所擬依軍臨敵境違期三日斬監候律斬監候秋後處決卽派妥員押解刑部監禁趕入本年朝審情實辦理長清但知留兵防守並不通盤籌畫催令進援亦屬咎有應

得惟該大臣究非奉派帶兵之員而撫馭夷回尙爲安靜且扎隆
阿致信令將伊什罕伯克托克托呢雜爾等家產查封並將緣坐
人犯一併拘禁該大臣均未照辦頗有識見長情著加恩革去副
都統賞給二等侍衛仍作爲阿克蘇辦事大臣哈豐阿係烏嚕木
齊提督本不應受容安節制乃聽其指使迂道前行稽延日久實
屬錯誤姑念此次進援究係該提督帶兵先到雖未接仗殺賊惟
令賊眾一聞兵到卽行遁竄得以解圍哈豐阿著加恩改爲革職
留任額爾古倫貴成孝順儘進兵究屬遲延一併交部議處○諭
軍機大臣等長齡奏請將扎隆阿先行撤任辦理緣由一摺扎隆
阿所稱伊薩克勾結內應一事朕於楊芳等初次奏到時卽以伊
薩克身受重恩不應遽懷搆貳恐係扎隆阿有心傾陷降旨令該
將軍親提審辦嗣據扎隆阿屢次陳奏並於該將軍咨提人證時

不卽將伊薩克起解疊經降旨諭令秉公審訊並傳旨將扎隆阿解任及伊薩克一併提解茲據奏行抵阿克蘇面晤長清告知並據常格咨稱前接扎隆阿來信並咨令將托克托呢雜爾等家產查封緣坐人犯一併拘禁等情該大臣等以案情尙未確實恐遽查辦致滋惶惑並未照辦所見甚是見在訊據布魯特毛拉等各供及詢悉情形所稱逆首明巴什因攻城不得手向愛散問計愛散告以見有伊薩克在城是以回心固守須得先將伊薩克誣讟及該城兵民於賊匪圍城之際將伊薩克衙署鈔沒殺斃大小伯克回子二百餘人均稱此次賊匪進卡滋事係伊薩克所使強令扎參贊看守又於圍城時有兵民千餘人口稱伊薩克有句結情事齊赴阿奇木署中拏住伯克回子等約二三百名並不待參贊之諭登時殺戮淨盡財物搶擄一空伊薩克夫婦先赴參贊署中

僅以身免各等語雖未可遽爲深信而於伊薩克句結情事未真
扎隆阿辦理錯謬已可槩見且任聽兵民人等恣行殺掠並將大
小伯克回子殺斃至數百人之多姑無論所稱伊薩克句結內應
是否屬實卽此任聽妄殺一節扎隆阿昏謬之咎實屬難辭該將
軍以該參贊所奏情節與詢問情形迥不相符難保其不無回護
任聽妄殺之前愆轉受兵民之挾制因而巧爲彌縫所料不錯其
於該將軍咨提人證時不卽將伊薩克起解轉藉口恐奸細探聽
在途劫奪並非玩泄實屬有心違抗昨已有旨令該將軍傳旨將
扎隆阿解任見據奏到亦請卽行解任並以摺報往還需時恐該
員稽留多日或致別生枝節一面奏明一面先將該員撤任好極
好極能如此不愧朕推心倚任矣扎隆阿於案情未定之先妄行
殺戮已失本處良回之心況任聽兵民恣肆毫無約束復分致阿

克蘇庫車令其查封拘禁以致二城回眾亦各惶惶似此謬妄糊塗之員不但不能無罪仍當治以重罪扎隆阿著卽革職該將軍見飭知哈豐阿令其卽帶馬步官兵千餘名護解伊薩克一千人證迅速赴阿克蘇以免疏虞所見又是此事關繫重大必應秉公查辦該將軍之心卽朕之心所奏情形與朕疊次所降諭旨均相符合可嘉之至此時伊薩克等計可陸續解到該將軍務須嚴切根究期於水落石出如果伊薩克有應與提到人證質訊之處固當令其質對卽扎隆阿有應與各犯質對之處見已降旨將伊革職伊旣不知自愛不值爲伊顧惜顏面亦著令其質對將此案虛實悉心研究務得確情按律定擬具奏儻審明伊薩克實無勾結情事著於審明後將道光十年十二月初十日初次寄諭該將軍之旨向伊薩克明白宣示俾知伊忠悃素著此次被人傾陷朕早

鑒及以安其心至喀什噶爾參贊大臣昨已有旨令哈琅阿楊芳
暫行護理著仍遵前旨飭令籌辦一切所請令胡超幫辦之處著
毋庸議至另片奏此次起釁根由詢之該布魯特比及回子等皆
稱由於鈔沒安集延驅逐出卡因此懷恨勾結等語究竟該布魯
特等所稱是否屬實著再行詳細查明據實具奏本日據玉麟等
奏體察邊界見在情形酌籌辦理所稱那林距喀什噶爾卡倫較
近由彼經過特木爾圖淖爾迤北卽是吹塔拉斯一帶當爲討逆
所必至請飭長齡等於派兵出卡捕拏逆犯之便順赴吹塔拉斯
等處確查等語著長齡自行酌量如須派人前往著飭令由伊犁
前往會同確切查勘儻無須派人前往卽咨會玉麟等妥爲查勘
辦理又另摺奏體察中外情形新疆茶政及夷商貿易似應酌復
舊章並著長齡詳查妥議○丙寅諭國家赦宥之典法外施仁欲

海內咸知遷善遠罪以成太平之治朕祇遵 成憲兢兢業業以

愛育黎庶爲懷茲當紀年開表寰宇乂安允宜循照舊章用宏矜

恤所有刑部及各省人犯除常赦所不原外著酌量案情減等發

落俾獲邀肆赦勉圖自新以副朕欽恤庶獄咸中有慶之至意○

庚午召徐炘來京以楊簧爲湖南按察使由江蘇
糧道遷○壬申諭軍機

大臣等長齡奏訊據大槩供詞一摺伊薩克案內常奉清一名業

經守備楊應元解赴阿克蘇據該將軍訊取各供具奏內常奉清

稱參贊衙門書辦說幕友周姓因兵民鈔殺伯克回子人數過多

並沒憑據都是一片疑心將來甚難入奏又楊應元稱當日鈔殺

時卽係常奉清與劉漢閭良貴爲首彼時參贊聽見嚷鬧卽差章

京金奇賢持令箭前去攔阻不住各等語幕友周姓係案內要證

其劉漢閭良貴旣據楊應元稱鈔殺時曾與常奉清爲首亦應提

到質訊卽章京金奇賢自當一併訊問著卽迅速咨提到案嚴切
根究前因扎隆阿有心違抗傳旨解任旋據奏到亦請卽行解任
復經降旨將扎隆阿革職與伊薩克一併提解此時人證計已陸
續到齊該將軍務提集人證秉公審辦如扎隆阿供詞狡展卽一
面拏問一面奏聞總須水落石出鞠訊明確按律定擬具奏本日
又據扎隆阿奏到二摺一係密奏伊薩克之事一係接獲逆賊訊
取供詞分別辦理均著長齡查辦所稱逆犯毛拉庫恰克托胡達
呢雜爾二名著卽歸案嚴審又另片奏買辦糧料及派員辦理軍
務公局等事著卽行飭知哈琅阿楊芳妥爲辦理至喀什噶爾參
贊大臣前已降旨令哈琅阿楊芳暫行護理朕意將來卽以璧昌
補授喀什噶爾參贊大臣並將常德賞給升銜作爲葉爾羌辦事
大臣其烏什辦事大臣一缺何人可以勝任著該將軍保奏一員

請旨簡放至喀什噶爾向設幫辦大臣見在是否仍須補放著該將軍體察情形據實覆奏如仍須補放亦著該將軍擬保請旨又據奏常奉清供賊人圍城數日後有安集延一人向城上告稱且不要放槍礮那些圍城千餘賊都已跪下令通事來說我們是喀什噶爾阿克蘇伊犁等處逐出的安集延在卡內買賣多年並未隨張格爾造反忽於八年閒將我們的茶葉大黃全行鈔沒入官並不給價驅逐出卡無以爲生後來有布魯特在我們愛曼拏著茶葉誇說這是大皇帝賞還的我們更加氣忿因此進卡止求將茶葉大黃給還仍准在卡內作買賣就是恩典等情又十二日有本城許多黑帽回子拏著羊麪瓜酒並未拏著器械各等語該將軍奏出關後訪聞情節與所供均屬無異著再行詳細訪查覈實奏聞○調鍾昌爲吏部左侍郎貴慶爲刑部左侍郎○丙子諭三

載考績實爲激揚大典滿漢諸臣有能盡心所事任勞任怨者自應甄敘有年老而精力不衰者仍當留任茲京察屆期該部將京外各大員開單題請朕詳加酌定大學士曹振鏞吏部尙書文孚戶部尙書王鼎工部尙書穆彰阿久任軍機大臣贊襄勤慎承旨詳明大學士長齡中外宣勤懋績顯著茲又奉命再莅回疆協辦大學士兩廣總督李鴻賓歷任封疆實心任事陝甘總督楊遇春身經百戰絕域宣勞畀以封疆克勝鉅任陝西巡撫鄂山兩次總辦軍需誠實精詳毫無貽誤俱著加恩交部議敘兵部左侍郎賈允升盛京戶部侍郎多山俱年力就衰著以原品休致福建巡撫韓克均辦事遲緩不能振作尙無劣迹可指亦著以原品休致餘著照舊供職○轉張麟爲兵部左侍郎以吳椿爲兵部右侍郎

由左

副都御史遷

○調凱音布爲盛京戶部侍郎以鐵麟爲盛京禮部侍郎

由左副都御史遷

○以魏元烜爲福建巡撫孔昭虔爲福建布政使陳變

爲浙江按察使

由廣東鹽運使遷

○戊寅調吳椿爲工部左侍郎以何淩

漢署兵部右侍郎

由大理寺卿署

○己卯召葉紹本來京調邱鳴秦爲山

西布政使以恩特亨額爲安徽布政使色卜星額爲安徽按察使

由甯池太廣道遷

○辛巳諭軍機大臣等陶澍奏接受兩淮鹽羨並陳見

辦情形一摺據稱兩淮鹽務積敝之餘章程甫立節目尙多如裁

浮費去根窩慎出納禁淹消散輪規減價敵私諸款皆商情所不

樂應申明國法從實妥辦一有瞻玩卽併其從前弊混之罪追革

查鈔至文武員弁向於疏銷巡緝不肯認真出力甚至得規包庇

必應整飭等語見當整頓之際功令森嚴該督務須實心查辦力

除積弊俾各商及員弁等咸知儆畏於銷引緝私方有裨益至所

稱見在商人力能辦運者不過二三十家新商僉募尙需時日兼

之漢口積引不下數千萬硃非三兩月所能罄盡江西情形亦然
前綱既滯則辛卯新鹽卽截清限界於春月開綱而行抵楚西各
岸已在夏秋之際明歲奏銷勢不能如期完竣等語自係實在情
形所有明歲奏銷著准其稍寬時日屆期奏明料理此後仍當年
清年款不得復蹈故轍其餘未盡各事宜並著該督隨時察看分
別奏咨覈辦該督身受重恩總當任勞任怨悉力籌辦力圖振刷
以期鹽務日有起色勉副委任方爲妥善諒該督亦必不甘蹈會
燠等之覆轍也○刊 御製文初集成 御製序文○是月給江
蘇沛縣安徽蕪湖等八州縣衛浙江富陽縣被災口糧貸三姓雙
城堡兵民直隸磁州等九州縣湖南安鄉華容二縣河南武安縣
甘肅會甯等五縣被災口糧屋費籽種蠲緩吉林等四處被水兵
民新舊額賦緩徵直隸磁州等五州縣山東鄒平等五州縣衛被

災正雜額賦

七

二月己丑 上御經筵○壬辰諭長齡奏查訪逆回起釁根由一摺此次逆回滋事前疊經降旨令該將軍查明起釁根由據實具奏不准含混茲據奏行抵阿克蘇後詢據布嚕特比等僉稱霍罕安集延逆賊入卡滋事由於鈔沒貨物驅逐出卡以致懷恨勾結與沿途所訪輿論相符復據各城咨覆均與傳訊各供無異是起釁根由顯係驅逐安集延查鈔家財斷難眷口禁止大黃所致那彥成上屆係特奉諭旨前往辦理善後事宜乃不能體察情形籌畫妥善行之未及二年又有逆回滋擾之事誤國肇釁罪有攸歸著先行革去太子太保銜拔去雙眼花翎並革去紫韁交部嚴加議處伊子容照著逐出乾清門並革退理藩院右侍郎鑲白旗護軍統領正黃旗蒙古副都統國史館清文總校著賞給三等侍衛

在大門上行走○癸巳調惠顯爲理藩院右侍郎以鄂順安爲盛

京刑部侍郎調孔昭虔爲貴州布政使以惠吉爲福建布政使光

聰諧爲福建按察使

由湖北荆宜施道遷

○甲午命陶澍裁減鹽務浮費○

乙未奪那彥成職調琦善爲直隸總督以鄂山爲四川總督史譜

爲陝西巡撫調裕泰爲陝西布政使以吳榮光爲湖南布政使

布政使

○己亥以廖鴻荃爲內閣學士兼禮部侍郎銜

由少詹事遷

普保

何淩漢俱爲左副都御史

普保由通政使何淩漢由大理寺卿遷

○辛丑

上啓鑾

謁西陵○免經過地方額賦十分之三○乙巳

上謁

泰陵

泰東陵 昌陵○

上閱視萬年吉地賜名龍泉峪○丙午清

明節 上再謁

昌陵行敷土禮

隆恩殿行大饗禮回鑾○己

酉 上還京師○是月貸湖北荆門營上年被水兵丁倉穀

三月癸丑朔諭朕本年五旬萬壽慶辰業經疊沛恩綸覃敷闡澤

所有莊襄親王絛課之子莊郡王奕賣著加恩賞還親王英和著
加恩卽行釋回伊子奎照奎耀俱著隨同回京○己未廣東黎匪
滋事命李鴻賓等勦之○辛酉諭軍機大臣等有人奏廣東貿易
夷人日增桀驁英吉利自恃富強動違禁令其餘各國相率效尤
道光十年該夷等違例乘坐綠呢小轎又帶夷婦入城在洋行居
住當經兩廣總督及粵海關監督出示申禁而英吉利大班等統
領各夷向該督監督等衙門屢次遞稟語多誕妄經該督調兵彈
壓膽敢統率水手搬運槍礮器械到館儼有抵敵之勢是直以有
恃無恐之情行其有挾而求之計不可不嚴爲防範又稱漢奸從
中唆使傳遞消息簸弄是非以遂其肥己之計澳門居民半通夷
語其各洋行服役之人及省城之開設小洋貨店此內均易藏奸
更有匪徒練習快礮船隻爲夷人運私偷稅賄通兵役朋比爲奸

俱應嚴密查拏盡法懲治又稱夷人違例八條一致斃漢民藏匿正兇抗不交出一在省城橫行街市漢民不敢與較一夷婦生子多雇漢乳媽服役及向漢奸私買婢女一內地書籍例不出洋近日漢奸多爲購買並有課其子弟者一上年夷人在洋行門外私設臨水馬頭以爲偷稅地步一上年該督等所出告示皆被夷人塗抹夷人擅出告示禁止洋商坐轎洋商不敢不遵一向例夷人不准進靖海等門上年二三百人以探聽批稟爲名擅自擁入莫敢攔阻一夷人銷貨完竣不准逗留近則往往在粵省過年等語以上各情節於海疆重地大有關係豈可一味因循長其藐玩著朱桂楨逐款嚴密訪查據實具奏毋許含混並查明地方官如有苛虐夷人情事亦當一併參處示懲勿稍隱飾○癸亥 上親耕藉田○丁卯調寶興爲吏部左侍郎博啓圖爲戶部右侍郎轉桂

輪爲兵部左侍郎調那丹珠爲兵部右侍郎惠顯爲工部左侍郎

由理藩院
右侍郎調

○戊辰李鴻賓等奏上年春閒崖州黎匪黎那雞等因

乏食出掠經瓊州鎮道府督兵圍捕卽殺首犯投首十一月內復有黎匪糾集搶劫調兵查拏訪係韋色容張紅鬚張亞基數人爲首命迅速捕獲究辦○壬申兩江總督陶澍奏捕獲盜匪倚梟分別懲辦得旨可見廢弛已久汝係朕特加信用之人能如此存心爲國宣力不但汝永承恩澤朕亦得知人善任之名當勉之又勉有加無已以副朕望○辛巳重修康熙字典成○是月貸湖北督標撫標暨武昌黃州各營兵丁倉穀山東海豐場水衝修灘費展緩河南內黃等六縣逋賦並雜款

夏四月丁亥諭內監潛逃例有應得之罪嗣後各直省督撫府尹等遇有逃走太監一經地方官盤獲無論有無滋擾情事著一面

具奏一面解交內務府○戊子 上閱健銳營兵○辛卯 上臨
視 皇長子奕緯疾○甲午諭大阿哥奕緯自上年秋閒違疾至
今春甫經就痊茲復患病旬餘竟爾不起深爲悼憫著追封多羅
貝勒所有應行典禮著照皇子例辦理並派總管內務府大臣寶
興經理喪事其一切事宜著各該衙門察例具奏○戊戌諭奕紹
等奏查定例貝勒女封郡君止准封嫡長女一人其餘嫡出庶出
之女俱不授封又追封之爵皆不傳襲其子女亦不照追封之爵
授封向來均照此辦理多羅貝勒追封成郡王繇懃並無嫡女俱
係庶出例不應封除伊第八女第九女俱因聞夫故過門守節授
封縣主不計外其第十女於道光五年出聘時禮部照例未經奏
請授封辦理並未錯誤本年其第十一女出聘時禮部卽奏請授
封旋復請將第十女補封均與定例不符所有繇懃第十女第十

一女俱著照定例不准授封其道光五年將縣勲第十女請封指駁之承辦司員係照例辦理著免其議處本年縣勲第十一女出聘禮部堂官並未詳查宗人府遽請授封與例不符著交部察議

○庚子

上閱大員子弟馬步射

○癸卯

上詣

黑龍潭祈雨

○乙巳諭軍機大臣等陶澍等奏清水敵黃重運漕船行走順利惟洪澤湖水勢浩瀚暫消復漲及下游揚糧啓壩洩水各情形一摺覽奏均悉本年三月底清高於黃將禦黃壩啓通之後黃水旋長旋消重運漕船均係順流渡送無須倒塘灌放臨清攔黃兩堰免於啓閉行走尙爲順利其挽上三閘因上水高於下水三尺有餘逆流繚挽較爲費手經該督等分委員弁併力趕辦該督等時往督催見在三進幫船截至四月十二日止已渡黃六百二十餘隻下餘幫船一千一百數十隻可以計日渡竣惟洪澤湖水勢已

長至一丈九尺餘寸刻當夏令雨水漸多以束清壩及仁河信壩
三處分洩尙停積不消儻此後再有增長勢必不能容納該督等
擬俟在後幫船全過邵伯鎮卽將上游洪澤湖之智壩義禮二河
下游運河之灣頭壁處人字等河刻日啓放騰空湖面以備續漲
著該督等督同工員務須認真加意防守俟漕船渡竣後應如何
宣洩盛漲並隄堰掣塌各工應行修築之處卽當妥爲籌辦毋致
稍有疏虞○己酉以捐辦上年回疆口糧並防守出力免葉爾羌
和闐回戶本年應徵普爾錢並減運布匹○庚戌李鴻賓奏黎匪
韋色容等伏法地方肅清○是月緩徵直隸磁州等三州縣河南
安陽臨漳二縣上年地震災新舊額賦

五月甲寅實授鍾祥雲南布政使○己未諭陶澍奏淮北商力積
疲請暫籌借項官督商運等語淮北商力疲累已久此時招商僉

辦難得其人且各處需鹽孔迫不得不先籌運濟據該督查明永豐壩見有存貯歷次運庫發銀收買官鹽九萬一百七十二引應擇誠實商人借給水腳領運分赴各岸並遴員督運俟其到岸售有課銀收回應完錢糧及鹽價借項繳庫歸款其各滯岸銷鹽無多卽由附近暢岸隨時撥往接濟所需運腳銀兩著照所請准其在於已丑殘引加斤案內帶徵課銀催商趕緊交完先行酌動銀二十萬兩以十二萬兩爲前項運腳之需其餘八萬兩因海州分司所屬板浦中正臨興三場運商久不捆鹽竈戶困苦著查照上年原奏辦理趕緊收買卽將收買之鹽存貯各場俟本年秋單發運至壩飭商領運繳價還庫所有收買發運事宜卽責成淮北監掣同知陳在文妥爲經理仍趕緊招商接辦以肅鹺政○予皇長子貝勒奕緯諡曰隱志○甲子移直隸鳳河汎把總爲永定河

南八工下汎把總○丙寅湯金釗緣事降兵部右侍郎罷上書房
總師傅○調潘世恩爲吏部尙書以朱士彥爲工部尙書白鎔爲
左都御史調申啟賢爲吏部右侍郎以何淩漢爲工部右侍郎姚
祖同爲左副都御史由通政使遷○禮部左侍郎龔守正緣事降通政
使○辛未雨○乙亥諭戴均元子戴詩亨加恩以七品小京官用
伊孫戴嘉德加恩賞還舉人英和孫錫祉加恩以六部筆帖式用
○左副都御史姚祖同以原品休致○丙子諭軍機大臣等有人
奏鴉片煙積弊請杜絕來源一摺據稱洋船私帶煙土來粵於附
近虎門之大魚山洋面另設夷船囤積稱爲鴉片躉並有夷目兵
船名曰護貨同泊一處勾通土棍以開設錢店爲名暗中包售煙
土呼爲大窩口如省城之十三行聯興街多有此店奸商到店與
夷人議價立券以憑到躉交貨謂之寫書又有包攬走漏之船名

曰快蟹來往如飛呼爲插翼其船星夜遄行所過關津遇有巡丁追邏竟敢施放槍礮關吏莫敢誰何又不報官懲辦是以肆無忌憚此種快蟹見有一二百隻之多凡由蕙送貨至竄口者皆係此等船包攬各巡船通同作弊按股分贓包庇行私其弊尤甚其銷售各路如福建之廈門直隸之天津廣東之雷瓊二府皆由竄口立券到蕙交貨其餘各省私販入口出境均係快蟹船包送出境必由之口如南海屬之仙館汎關石汎紫洞口落松海口香山屬之黃圃三水屬之西南汎蘆包埠等處其由大竄口分銷內地悉因奸民串同各衙門臺役開設私局名爲小竄口各處城鄉市鎮所在皆有查煙土一項私相售賣每年紋銀出洋不下數百萬是以內地有用之財而易外洋害人之物其流毒無窮其竭財亦無盡等語鴉片煙流毒最甚前已屢降諭旨通飭各直省督撫各就

地方情形設立章程嚴行查禁惟鴉片煙多係來自外洋實聚於廣東若不杜絕來源是不揣本而齊末雖內地嚴定章程於事究無裨益見經有人條奏所陳各弊是否實在情形著李鴻賓等確加查覈如何使煙土不能私入洋面不能私售各夷於貨船之外不得另設船隻之處悉心酌議務將來源杜絕以淨根株勿令流入內地以除後患該督等若能盡心盡力除中原一大害厥功不小矣勉益加勉○己卯 御製慎德堂記曰崇儉去奢慎修思永孰不知其所當然哉非知之艱行之惟艱在士大夫猶患其位不期驕而驕祿不期侈而侈膺天命紹大統者可不兢兢焉惴惴焉懍夫皇天無親惟德是輔念夫祖功宗德創垂不易後世子孫坐享承平之福縱不尚奢華無所加增自問已覺不安矣若敗度敗禮視富貴爲已所應有是直不可與言者也又奚能常保厥位耶

况我大清 龍興東土首重樸實 列聖丕承凡心法治法無非
以勤儉訓後誠以世變風移敝化放心有不期然而然之勢苟非
操之固審之精樸素自甘慎終如始難與言儉也至於飲食勿尙
珍異冠裳勿求華美耳目勿爲物欲所誘居處勿爲淫巧所惑此
猶儉德之小者不作無益害有益不貴異物賤用物一絲一粟皆
出於民脂民膏思及此又豈容逞欲妄爲哉所謂無爲而治俾天
下陰受其福而民不知者是也然行儉責在一人不以天下自奉
非槩從慳吝也若救饑拯溺去暴安良國用之常經民生之休戚
正措施之不遑又何可稍存吝惜於其閒也是以修身務存儉約
之心以期永久圖治之道可不加慎而切記之乎

六月壬午調裕泰爲安徽布政使恩特亨額爲陝西布政使○乙酉 文宗皇帝生 上之第四子也○己丑召慶善來京調恩特

亨額爲浙江布政使以楊名鳳爲陝西布政使調李義文爲陝西

按察使以何煊爲雲南按察使

服開按察使

○乙未 皇五子奕諒生

○己亥命賑安徽舒城等二十五州縣水災○辛丑 上詣 黑

龍潭祈雨○丙午諭阮元等覆奏查禁鴉片煙章程一摺滇省沿

邊夷民向有私種罌粟收取花漿煎膏名爲芙蓉以充鴉片內地

民人亦復栽種漁利自應設法查禁茲據該督等奏稱民間私種

罌粟綠費工少而獲利多積習已久該省又多深山窮谷若不峻

立其防則奸民易犯惟所稱每年冬令罌粟出土之時該地方官

會同營員親往躡查鋤毀一次次年春末開花結苞之時再躡查

剷毀一次等語該處深山窮谷較多若令種植之家鋤剷是必不

可信之事若豫帶多人以備鋤剷之用又無此查辦之法且據稱

飭各地方官於關津要道稅口加派誠妥胥役不時督率稽查行

旅商腳販帶之弊試思胥役之中焉有誠妥可信者若添派多人責令稽查不但有名無實且轉滋紛擾無非多增一弊所議皆不過紙上空談於事何濟此事惟當責成該地方官隨時留心訪查不必拘定月日或於稽查保甲之便前往躡查或於猝不及防之時親往查察如有奸民私自種植卽行拏究懲辦儻查無私種將來因案發覺該督等派員前往查出弊端卽將該地方官嚴參懲處並著該督等於每年年終具奏一次至土境夷民栽種罌粟係在迤西迤南邊外著照所議責成該管道府嚴飭土司曉諭夷民毋得栽種並於每年冬閒由土司親查如有私種卽令目練拔毀照例枷責田地歸土司招練承種以爲練田如該土司不能認真查察卽行參究示懲毋許寬縱○以江蘇水災命買運奉天河南川廣米麥免各船關稅○丁未雨○是月給江蘇上元等九縣衛

水災口糧貸江蘇淮安衛災屯籽種緩徵直隸大興等十四州縣
河南延津等十六州縣被災新舊額賦

東華續錄

道光二十四

臣王先謙敬編

臣周嗣蕃恭校

秋七月癸丑高郵湖河溢○調林則徐爲江甯布政使陸言爲河南布政使○丙辰以蔣祥墀爲左副都御史由太常寺卿遷○戊午命陶澍偕程祖洛籌辦江蘇災賑並偕張井勘辦漫口隄工○己未命留安徽藩庫正項及鳳陽蕪湖關稅銀五十萬兩備安徽賑需並免各關米稅○辛酉改直隸豐潤霸州營田仍歸地方官經理○己巳命白鎔查勘江南災賑○癸酉諭長齡等奏扎隆阿參奏伊薩克勾結謀逆一案審明盡屬虛誣並究出商同捏造之委員迎合承審之章京及教供誣證之通事回子等按律分別定擬一摺此案已革喀什噶爾參贊大臣扎隆阿身任邊疆重寄於卡外賊

情未能覺察率派滿漢官兵冒昧輕出以致全行陣歿又不將官弁伯克回民等妥爲布置令其併力防堵一任伯克等奔入新城潛匿回城失守轉因民眾浮言將回眾全行拘集遂致兵民乘亂殺掠扎隆阿束手無策已屬罪無可逭迨圍解之後又復姑息奸民聽信劣幕竟敢藉賊匪反閒之輩言捏構疑獄圖陷伊薩克以叛逆重情嗣被參解任仍復摭拾虛詞妄奏肆抵是扎隆阿污蟻伊薩克之罪尙小其以無據之詞妄行入奏欺君罔上之罪爲大本應在軍前卽行正法示眾否則解京廷訊後再行正法實屬罪所應得姑念其在喀什噶爾防堵三月保守城池究有微勞尙可暫寬一綫著照所議斬監候秋後處決歸入明年朝審情實辦理先在阿克蘇枷號兩箇月滿日派委妥員解交刑部監禁委員候選同知直隸州周彭齡於扎隆阿奏參伊薩克句結之事慮及枉

殺多人難以入奏輒任意羅織希圖構成冤獄長齡等擬以發往軍臺效力尙覺情重法輕周彭齡著革職在喀什噶爾枷號一箇月滿日發往伊犁充當苦差以爲劣幕舞文者戒喀什噶爾印房幫辦章京主事職銜金奇賢於委審各回子供證一味迎合任聽這事莫洛人等串供誣指實屬故入人罪照例罪應杖流念其隨同守禦微勞著革職免其治罪喀什噶爾印房章京國子監助教升用同知春祥與金奇賢會同審訊厥罪維均亦著革職喀什噶爾換防總兵多隆武於兵民乘亂殺掠恃眾挾制不能彈壓約束已有應得之咎迨哈琅阿咨詢該總兵輒依扎隆阿原奏誣捏各款扶同咨報實屬錯謬多隆武著卽革職參贊大臣哈琅阿楊芳草率取供輒行人奏亦屬不合著一併交部議處回子郡王銜阿奇木伯克伊薩克著仍留軍功王爵飭令駐京當差其次子邁瑪

特准其隨帶進京伊長子愛瑪特著仍回阿克蘇阿奇木伯克之任回務章京福奎見經訊明伊薩克並無謀逆情事其前被扎隆阿奏參失察請革職治罪之處著無庸議卽飭令回任供職藍翎千總升任漢中鎮屬守備楊應元於差探旋回時因疑妄稟見雖據實供明惟前後供詞狡展本應治罪因該弁守城殺賊面受槍傷亦有微勞著拔去藍翎降爲把總以觀後效兵丁閻喜詭言有賊致眾人一齊擁進又民人劉漢閻良貴派充民勇頭目不遵禁令不管束眾人著將閻喜革退名糧與劉漢俱發邊遠充軍閻良貴因守禦受傷著減爲杖一百流三千里常奉清供情始終含混殊屬狡詐著發邊遠充軍劉紹濟李紹庚始以懷疑率請參贊接查嗣後任意妄供亦屬狡詐俱著杖一百徒三年布魯特比把哈提拜占帕拉特訊未從逆且被賊鎖禁用銀贖免乘閒投回著酌

加賞賚飭令各回游牧回子通事七品明伯克阿布都吉里教供
誣指著革去七品明伯克發給各省駐防官兵爲奴其在喀什噶
爾供證伊薩克句結之各回子見俱到案供明均著免其置議至
喀什噶爾民眾當賊匪圍城時妄肆浮言搶掠財物濫殺無辜不
法已極本應悉行正法姑念其隨同守城三月尙有微勞著從寬
免死將來安置各處儻有稍滋事端無論所犯何事卽行正法其
無辜被戮之大小伯克著該將軍等查明一併照陣亡例給予卹
典同時被殺之回眾並著確查有無家屬按名照例給予卹賞銀
兩以示優卹○諭軍機大臣等據長齡等奏會籌善後事宜一招
前將內外諸臣各條奏回疆善後事宜發交長齡覈議並派玉麟
一同悉心籌酌務期經久可行茲據奏參贊總理八城應請移駐
葉爾羌乃能適中扼要措置咸宜該處地廣戶繁可以多駐官兵

去秋回子用命著有明效該城距喀什噶爾六站外夷進卡接見在不遠不近之間足資控制其幫辦大臣仍照例專管本城事務再將和闐領隊大臣移駐一員隨同參贊就近聽其調遣喀什噶爾卽留換防總兵一員在彼統兵駐守英吉沙爾仍駐領隊大臣一員在於葉爾羌阿克蘇適中之巴爾楚克一帶添調總兵一員統兵駐守以爲樹窩子咽喉鎖鑰添此一鎮則六城相距均不過數百里聲氣易爲聯絡和闐在一隅止留領隊一員足資辦理其滿漢防兵額數請於西四城見有兵六千餘名外再酌留伊犁烏嚕木齊馬隊二千名陝甘綠營兵四千名通計原額新增共滿漢兵一萬二千餘名除阿克蘇烏什見各有兵一千二三百名無庸議增外喀什噶爾擬駐綠營兵三千名以總兵統之作爲前敵防守邊卡如探有卡外情形隨時具報如遇大股賊匪卽稟報參贊

發兵援剿英吉沙爾擬駐伊犁馬隊五百名綠營兵一千名領以遊都佐領等官統歸領隊大臣管轄爲前後二城中權接應巴爾楚克擬駐綠營兵三千名以總兵統之擇地築堡駐紮和闐僅有防兵二百餘名擬再添兵二百餘名共足五百名以上各處防兵均令各該管官認真操練此外滿洲兵二千名漢兵四千餘名擬令全駐葉爾羌應以副將協領等官分領該參贊等務令加意訓練合力操防至防兵應需糧餉於各省綠營兵額內暫裁百分之二每年可節省銀三十餘萬兩所有酌添防兵六千名卽在此項節省銀內支給有贏無絀等語均著照所議辦理至所稱新增兵額酌量隨時抽撤之處究竟將來如何情形方可裁撤及裁撤之後又將如何辦理始臻妥善必須豫爲籌畫計出萬全見經此次籌議自必控制得宜賊匪斷不敢遽萌窺伺儻萬一入卡來犯總

要無須內地籌餉調兵方爲妥善必應從長計議庶免撥運之勞而成久遠之道卽屯田一事以回疆物產供回疆兵糈均應酌定章程善爲經理將來各城改設各官必須慎揀得力之員以資委任該將軍等久駐回疆該處各員賢否自必深悉著出具切實考語詳晰開單保奏候朕簡放至茶葉大黃等物准其弛禁其遠部落輸忱納款並霍罕果能獻出賊目請罪投誠再准其通商交易以示羈縻至上年入卡各賊目前次開單交該將軍等按名查拏務須將著名之犯多獲數名不可任其逃匿惟卡外夷情詭詐百出借縛獻賊目爲名妄希重賞切勿受其所愚致爲外夷所笑又喀什噶爾換防總兵多隆武見已革職著卽先行派員署理以重職守○以辦災遲緩降額騰伊爲江蘇按察使以衍慶爲湖北布政使

由江蘇按察使遷

○丙子頒

御製文初集○戊寅召薩迎阿來京

調嵩患爲盛京工部侍郎以普保爲理藩院左侍郎

由左副都御史遷

己卯命穆彰阿朱士彥馳往江南查辦災賑○調鄂順安爲盛京戶部侍郎凱音布爲盛京刑部侍郎○是月給湖南武陵等五州縣貴州桐梓縣石峴衛水災口糧貸江蘇江甯等六營災區兵餉展緩直隸冀州等五州縣歉收逋賦倉穀緩徵貴州貴筑縣水衝沙壓田賦

八月庚辰朔諭各督撫慎選州縣查辦災賑並緝拏會匪○己丑賞曹振鏞雙眼花翎○辛卯晉長齡太傅○壬辰諭上年戶部堂官失察蔡繩祖等私辦假照一案吏部等衙門按照本任年月久暫及失察名數多寡分別議以降級調用朕因人數過多一時簡用乏人加恩酌降頂帶分別留任本年因係朕五旬萬壽慶辰特降旨將各該管堂官頂帶賞還並將降留處分悉予開復各部院

堂官管理事務理宜督飭司員嚴查弊端假照一案書吏營私舞弊自嘉慶二十一年至上年破案時已及十有餘載如果歷任各堂官留心察看燭破其奸隨時懲辦何至經年累月書吏等肆無忌憚所獲贓私難以數計釀成如此重案且彼時如王開雲巴齡阿盛唐柏凝劉光三等均有條奏之件該堂官等亦應及時儆省覺察嚴加防範乃平日既漫不經心而於有人條奏議定章程之後猶復視爲具文並不嚴飭司員實力奉行似此因循疲玩相習成風實於官常吏治大有關係不可不亟加整頓著通諭各部院堂官嗣後務當振作有爲痛改因循積習除奸剔弊督率司員於應辦公事認真稽覈毋許仍前怠玩任聽書吏等散法營私致干重咎儻司官中有不實心任事者卽著隨時劾參不得有意姑容遲俟三年京察屆期方行甄別經此次訓諭之後各該堂官如仍

不知振刷精神盡心乃事或存推諉之心或存附和之意捫心自問能無愧乎若仍任聽書吏作奸犯科一經發覺必將各該堂官照部議分別辦理不稍寬貸朕綜理庶政一秉大公各該堂官總當激發天良隨時儆省毋謂寬典之可以屢邀也○乙未松筠以病免調穆彰阿爲兵部尙書富俊爲工部尙書以博啓圖爲理藩院尙書調桂輪爲戶部右侍郎轉那丹珠爲兵部左侍郎調鐵麟爲兵部右侍郎以那彥成爲盛京禮部侍郎○丁酉諭大學士九卿會議整飭各部院註銷章程一摺各部院辦理事件每月兩次造冊赴科道衙門註銷載明已完未完各若干件科道月終題奏如有遺漏逾限者參處各部又設立督催所查催各司所辦事件以防積壓其見辦事件按季具奏各部院復於年終赴河南道照刷文卷由河南道彙題必註明有無漏辦難結事件似此層層稽覈

覈立法至爲周詳承辦各員果能依限辦竣認真查察何至有積壓未辦之事任令該書吏於註銷時混行填寫且各司收文均有號簿每件之下必註明收文辦稿呈堂行文各日期如果細心查閱自不至遺漏遲延據大學士等奏稱若有專員稽覈自更有所責成著照所議令各部院於各司中揀派滿漢司員各一人專司查覈於文書收發逐件清釐填寫註銷時再爲詳細覈對掌印主稿司員仍不時留心稽察不得以派有專員管理卽置不問其督促所司員又將各司事件按限查催趕辦恐日久視爲具文該科道等必應認真稽察於每月註銷事件年終照刷文卷之時逐條磨對儻有未完事件書吏捏填已完者著隨時參奏懲辦以防延閣而杜弊端○己亥諭朕本年閱看三旗侍衛弓箭因思我朝自發祥以來 列聖垂訓八旗兵丁均以弓箭爲重必應永遠遵行

於平時勤加訓練使知激勵方足以成勁旅而資捍衛見在八旗都統副都統均係朕宗支親屬信任大臣如果認真整頓俾兵丁咸能得力卽養育兵閒散人等亦均知所觀感八旗營務自然日有起色該都統等盡心職守克副倚畀不獨朕知人善任深爲嘉悅卽該都統等亦覺與有光榮近因承平日久武備漸就廢弛各都統等於挑選披甲時往往計及於兵丁家口並不視弓箭之優劣爲去取殊不知兵餉之設原以養有用之兵並非養贍貧乏戶口各旗披甲均有應行練習差使與養育之調劑生計者不同顧名思義自不應以技藝平常庸懦無能者濫行挑補虛糜帑項且遇缺挑選隨時可以整頓並非另立操練章程何難實力奉行各省駐防兵丁固須悉心校閱八旗拱衛神京關繫尤重不可不加意講求著通諭八旗都統等嗣後遇有披甲缺出務當認真考驗

必須弓力較強箭有準頭者方准挑補不得藉口調劑以致有名無實並著查旗御史於各旗挑缺時留心查察如該都統等意涉瞻徇所挑之兵仍有弓箭平常者卽行據實嚴參其各省駐防挑缺時並著該將軍等一體遵照均以弓箭爲重以副朕講明武備訓勵旗人之至意○辛丑 上詣 黑龍潭祈雨○壬寅諭用人行政全在賞功罰過一秉大公方足以示勸懲本年春閒因那彥成上届在喀什噶爾辦理善後事宜不能妥善行之未及二年又有逆回滋擾之事降旨將那彥成革職昨因那彥成於嘉慶年閒曾在軍營出力道光年閒兩任總督辦理地方公事均無貽誤且追念伊祖阿桂宣力多年是以推恩後裔仍將那彥成補授盛京禮部侍郎本日據長齡等奏行抵喀什噶爾據哈琅阿璧昌等述知霍罕先後差來頭人密攷依斯邁提毛拉愛克木等三人呈遞

親供申訴五年以來斷絕貿易之苦累總以鈔沒驅逐爲詞懇求
照舊通商等語是上年逆回入卡滋擾實由那彥成嚴禁貿易鈔
沒驅逐安集延所致如果那彥成上屆辦理善後事宜體察情形
籌畫周妥俾逆回各安生業何至激而生變卡外回夷藉口聚眾
入卡滋擾伊身受重恩特奉諭旨前往並不悉心體察以致釀成
事端一年以來勞師糜帑卡內回民復遭蹂躪那彥成誤國肇釁
卽照例治罪實屬咎所應得豈可復邀錄用著卽革職以示懲儆
○諭軍機大臣等據長齡等奏馳抵喀什噶爾署阿奇木伯克作
霍爾敦率領城莊大小回眾二萬餘人於數十里內夾道歡迎僉
稱感戴皇仁誓不從逆經該將軍等親加慰諭接晤哈喇阿璧昌
等述知霍罕先後差來頭人密孜依斯邁提毛拉愛克木等三人
呈遞親供追敘七十餘年通商納貢之悃誠申訴五年以來斷絕

貿易之苦累總以鈔沒驅逐爲詞籲求照舊通商該將軍等以屯兵既久賊目迄無一獲若遽允所請不但霍罕不知敬畏並恐卡外諸夷輕視因將該夷使等傳至接見責令縛獻賊目送出裹去民回諭以爾伯克果能遵辦必爲奏懇恩施准令通商納貢該夷使等稟稱尙須遣人回去告知該伯克定奪情願酌留一人候信該將軍等擬照例筵宴酌加賞賚遣令旋回其所留之人交作霍爾敦妥爲管待等語霍罕差人呈遞親供籲求通商果無他意正可趁此責令縛獻賊目送出民回以爲一勞永逸之計著該將軍等俟該夷稟覆到日妥爲辦理據實具奏至善後章程前經該將軍等酌擬大局入奏當卽降旨諭令妥籌嚴辦茲據奏於經過各城留心體訪復咨行各該大臣將見行事宜有無格礙應行變通之處確查咨覆一面先將喀什噶爾必應籌辦之事與璧昌等豫

爲商酌仍俟奉到前摺批諭欽遵等語該將軍等悉心籌畫逐件妥議具奏務出萬全毋任稍留後患方臻妥善其上年喀什噶爾英吉沙爾兩處官兵民等困守三月有餘屢次剿殺賊匪以寡擊眾艱苦備嘗殊堪嘉憫除該將軍等業將守禦出力之兵民酌加賞賚外仍著確切查明再行覈實具奏候旨施恩所有見在大營駐紮滿漢官兵應裁撤者卽行裁撤著該將軍等酌量奏明辦理○調普保爲盛京禮部侍郎以恒格爲理藩院左侍郎

由副都統遷

○以保昌爲熱河都統蘇成額爲倉場侍郎吳榮光爲湖南巡撫調恩特亨額爲湖南布政使以吉恒爲浙江布政使調花杰爲四川按察使光聰諾爲直隸按察使以鄭祖琛爲福建按察使

按察使

使

○甲辰以德厚爲左副都御史

由大理寺卿遷

○丁未諭前據松筠奏

稱伊近來腰骭不能得力兩目昏花畫橐手顫且遇事健忘懇請

開缺調理朕平日待人以誠松筠係年老大臣既據奏衰病自應曲加體恤當卽降旨准其開缺並令安心調理昨據奏精力見已如前請賞差使朕復經降旨令署理正藍旗滿洲都統朕於松筠奏請開缺及銷假時兩次均經召見察看精力如常並無患病情形乃數日之間忽稱衰病難支忽稱精力見已如前既請開缺旋即請賞差使進退自由輕率陳奏君臣相與之際總當以誠爲主朕於各大臣推心置腹既以誠相感各大臣身受重恩尤當以誠相應似此任性自便殊失朕優禮大臣之意不知松筠自問於心能安與否嗣後各大臣務當仰體朕心共矢敬恭恪守事上以誠之意用副恩眷將此通諭知之○戊申雨○以浙江米價增昂准暫弛海禁販運臺米○是月給江蘇甘泉等十一州縣湖北江夏等十六州縣江西德化等二十縣水災口糧籽種修費貸江南江

甯駐防及溧陽營兵米緩徵江西德化等二十一縣水災新舊額賦

九月庚戌朔揚河廳永安汛十四堡漫工合龍○乙丑調貴慶爲

吏部左侍郎轉特登額爲刑部左侍郎調凱音布爲刑部右侍郎

以裕泰爲盛京刑部侍郎佟景文爲安徽布政使多容安爲廣西

按察使

由浙江鹽運使遷

○丁丑諭御史恒青奏在京各衙門咨送刑部

案件請查照定例以專責成一摺定例五城及步軍統領衙門收

審案件除罪應徒流以上及事涉宗室覺羅者方准咨送刑部其

餘戶婚田土錢債細故並竊盜鬪毆賭博及一切尋常罪止枷杖

笞責者均不得濫行送部緣刑部爲刑名總匯各省題咨案件均

須覈覆其見審情罪較重之案尤在專心推鞠始能無枉無縱至

在京各該問刑衙門遇有細小事件例應自行清理隨到隨結乃

近來各該衙門收審案件一經訊問每因兩造各執一詞致費推求不問其罪名輕重輒以本衙門例無刑訊爲詞率行送部迨經部訊其中竟有罪止枷杖笞責或併無罪可科者即使照例駁回而展轉查傳已不免耽延時日拖累無辜且一經送部愚民無知畏罪情急轉使吏役人等得以乘機詐騙百弊叢生殊失國家設官分理清釐庶獄本意嗣後著照定例五城及步軍統領衙門收審案件如訊係罪犯徒流以上及事涉宗室覺羅者送部審辦若罪止枷杖笞責等案必須隨時判結不得以案情稍介疑似濫行送部至刑部遇有各該衙門將不應送部之案率意咨送者亦不得濫行收審卽將原案駁回仍據實奏參以專責成而省訟獄○戊寅諭軍機大臣等長齡等奏見在籌辦情形一摺據稱欲令守邊兵丁實心出力莫如屯田之法但改防爲眷事涉紛更一時礙

難辦理請將各省綠營兵額各按馬步守兵分別均勻於每百名內暫裁二名咨照各該省覈辦卽各省裁缺所節經費由部彙撥解交甘肅藩庫自道光十二年爲始歸入回疆經費項下搭運前往以資支發已另降諭旨交該部查明具奏至所稱喀什噶爾英吉沙爾葉爾羌去秋守禦極得兵民之力卽回眾亦咸知兵威民力實足以捍衛地方正宜因勢利導俾聯爲一體此時該將軍等先將西四城可種之閒地招民開墾有願攜眷者聽之其回子地畝亦不禁其租給民人耕種見令璧昌出示招諭著妥爲辦理如試種有效皆知地利可守安家者漸多有願入伍者卽准其充食名糧收一眷兵卽撤一換防兵額其防兵在戍旣久有自願徙眷安家者亦聽其便數年之後可成一半眷兵一半換防之局節費自屬不少且旣有眷兵卽有餘丁種地之人日多挑兵之人不思

其寡彼時換防之額不難陸續撤回內地所謂以回疆物產供回疆兵精兵民日益蕃昌則回心日益固結是屯田一事實爲安邊便民足食足兵之良法俱照所議辦理其民戶如何安插編管高地如何設法引渠牛具籽種如何撙節經理試墾之初如何分段認種成熟之後如何按畝交糧此時招民開屯必須無礙於回眾生計將來因屯募兵必期無礙於邊地操防一切詳細章程著長齡玉麟與璧昌熟籌妥議務期經久無弊方爲盡善俟議定卽行會同具奏至茶葉大黃等物前經降旨准其弛禁所有新疆各城茶政著仍循舊例通行概免查禁又據稱前經諭令霍罕夷使緝獻賊目送出裹去之民回見在該夷使尙未旋回霍罕狡詐異常卽使此次人來竟能道諭獻出賊目亦未可全信爲眞自當防其詭詐如果實在悔罪投誠許其通商交易萬一犬羊之性難以德

乎亦不值久駐重兵惟當妥籌控制固我邊陲俾頑梗不敢復萌
窺伺所論俱是至前次奏請於西四城見有兵六千餘名之外酌
留伊犁等處兵六千名通計原額新增共滿漢兵一萬二千餘名
茲據覈計分駐西四城及巴爾楚克等處綠營兵較前通計總數
尙多一千餘名著卽查改畫一又喀什噶爾巴爾楚克總兵員缺
道光八年奏案係將涼州改鎮爲協以該處總兵作喀什噶爾換
防之缺今該將軍等擬於巴爾楚克添總兵一員陝甘地方緊要
擬將涼州鎮總兵仍改歸原地見擬安設總兵二員卽由陝甘實
缺總兵內不論滿漢擇其熟諳行陣平日訓練有方者揀派前往
如一時總兵內難派換防或卽揀選堪勝總兵之副將奏請賞加
升銜署理換防總兵亦著照所議辦理見在喀什噶爾換防總兵
員缺據該將軍等查明涼州協副將周悅勝久歷戎行邊情均所

熟悉著卽派委署理以資熟手○是月緩徵陝西葭州綏德州山東長山等三十二州縣甘肅碾伯等四州縣直隸大城等十一州縣陝西清澗米脂二縣水災旱災蟲災雹災新舊額賦展緩河南洛陽等九縣水災雹災新舊額賦

冬十月辛巳以貴慶爲泰甯鎮總兵官轉奕經爲吏部左侍郎調桂輪爲吏部右侍郎阿爾邦阿爲戶部右侍郎那丹珠爲工部右侍郎以裕誠爲兵部左侍郎

由內閣學士遷

○乙酉嚴烺以病免以林則

徐爲河東河道總督趙盛奎爲江甯布政使經額布爲山東按察

使

由雲南道遷

○丙戌諭長齡等奏請暫免喀什噶爾回子應徵布匹

一摺喀什噶爾每年額運伊犁布一萬一千一百一十四匹由各回戶按額徵交惟上年賊匪滋擾該回眾流離遷徙未盡歸業若令照舊輸將誠恐力有不逮加恩著照所請將道光十一十二兩

年喀什噶爾回子應交布匹暫行停徵免其交納以舒回力俟道光十三年該回戶等元氣漸復再行按額徵收○乙未命截留江西漕米八萬石於南昌九江府屬設廠煮賑○辛丑長齡等奏回疆參贊大臣請移駐葉爾羌總理八城統轄兩鎮兼提督銜其幫辦大臣一員仍照舊制專管葉爾羌本城兼轄和闐裁和闐領隊大臣一員移駐葉爾羌爲領隊大臣共駐滿漢防兵五千名改喀什噶爾幫辦大臣爲領隊大臣又駐總兵一員共滿漢防兵四千名駐和闐辦事大臣一員兵五百名英吉沙爾領隊大臣一員兵一千名巴爾楚克總兵一員兵三千五百名四城兩鎮合舊駐新增計滿漢防兵一萬四千名其印房等處各官既將參贊大臣移駐應將喀什噶爾葉爾羌兩城章京筆帖式互易葉爾羌設經牧章京一員專司牧事裁喀什噶爾葉爾羌糧餉章京二缺改設糧

餉同知二員再於葉爾羌喀什噶爾英吉沙爾巴爾楚克各設巡檢一員下軍機大臣等議尋議上諭軍機大臣等軍機大臣會同吏部兵部議覆長齡等奏請添設回疆官兵一摺回疆地方遼廓見辦善後事宜自應將官制兵數量爲變通悉臻妥協爲長治久安之計所有參贊大臣移駐葉爾羌有總理八城統轄兩鎮之責著兼提督銜參贊大臣業經移駐其印房等處各官亦著將喀什噶爾葉爾羌見設之章京筆帖式互相移易並著於葉爾羌添設經牧章京一員專司牧事喀什噶爾葉爾羌糧餉章京二缺著裁去改設喀什噶爾糧餉同知一員葉爾羌糧餉同知一員添設巴爾楚克糧餉同知一員再著於葉爾羌喀什噶爾英吉沙爾巴爾楚克等處各設巡檢一員同知管商民回子詞訟戶籍屯田巡檢管緝捕盜獄稅課均作爲邊遠差竣由陝甘兩省派往其英吉沙

爾分防巡檢歸喀什噶爾糧餉同知兼轄新添文職各官由各該大臣專轄參贊大臣統轄至拜城距阿克蘇較遠著添設分防拜城巡檢一員管理拜城賽哩木二處商民回子詞訟由陝甘選派作爲差缺此次所設同知三員巡檢五員俱著陝甘總督遴選操守廉潔辦事勤能之員前往該管大臣隨時甄別儻有不職之員將濫行派往之各上司參處至喀什噶爾等處添設滿漢防兵俱著照該將軍等所請辦理○壬寅諭軍機大臣等據昨日長齡等由五百里馳奏各城大臣咨請酌改各事宜分別條款一摺已明降諭旨依議辦理矣朕因該將軍等久在西陲夷回情形素所熟悉見在辦理善後事宜是以一切添官添兵之議勉從所請惟綜閱該將軍等奏議不過添兵堵禦添官經理皆尋常計畫何人不能溯查乾隆年間戡定西陲廟謨神算辦理周妥六十餘年久

安長治從未議及增兵如果必須添兵以壯聲威當日諸臣早經議及何待今日且從古以來未見有竭內地之兵力堵禦四夷而又能行之久遠者況回疆之極邊於居重馭輕之道大相刺謬儼然回疆添一省會日後何能治理必致內外俱困將如之何哉此時卽照該將軍等所議竟能一勞永逸將國家有常之經費爲外夷無益之張羅實不值如此辦理備仍不能安靖徒勞罔功尙復成何事體若該將軍等明示霍罕以大皇帝天恩浩蕩許該夷仍舊通商其茶葉大黃俱在所不禁並免其貨稅如此明白宣諭義正詞嚴霍罕卽犬羊成性亦當感激天恩不至倔强猶昔自可保其無事其縛獻賊目送出回民一節竟可置之不問以示大方至喀什噶爾添兵四千亦似太多終非經久之計且恐不免有擾累民回之事堂堂天朝轉爲霍罕牽制豈不爲外夷所輕視見在葉

爾羌旣設參贊大臣添兵五千似已足壯國威如果喀什噶爾換防總兵可以不設或酌留兵一千名足以濟事更無慮擾累民回較爲妥善著長齡等悉心遠謀熟籌妥議據實覆奏○甲辰左副都御史德厚蔣祥墀以職司糾儀失儀遲誤又不具摺請罪降二級調用○是月賑安徽無爲等二十三州縣衛江蘇上元等二十六州衛浙江仁和等七縣衛兩淮丁谿等六場水災給安徽桐城等十州縣湖南武陵等五縣江西德化縣口糧修屋費貸甘肅皋蘭等十八州廳縣口糧湖南武陵龍陽二縣民隄修費緩徵湖北江夏等二十九州縣衛安徽無爲等四十二州縣衛江蘇丹徒等四十四州廳衛江西建昌安義二縣兩淮丁谿等十五場湖南武陵等八縣衛浙江仁和等十七州縣場衛陝西葭州貴州桐梓縣災歉賦課展緩黑龍江等五處被災營屯驛站逋款

十一月己酉朔諭儀親王見已八十六歲年紀過高不宜勞勩嗣後 壽皇殿 安佑宮行禮免其隨往如遇應行禮日期著於府第內向上行禮以展其誠敬之心○辛亥諭軍機大臣等軍機大臣會同吏戶兵三部議覆長齡等奏各城換防員弁並新設差缺文職各章程分別准駁一摺著卽鈔給長齡等閱看回疆情形非內地可比見在議屯添兵雖爲慎固封守起見第兵增固足示威而官增究嫌糜帑況各城營伍惟期慎重操防俾收實效足以震懾夷回原不必悉照內地營制該將軍等請添各城武職員弁之處著照軍機大臣等所議令其仍照前奏再行酌量刪減以節糜費而昭覈實至請添文職同知巡檢各員雖前經照議准行此次復酌擬由內地選派及期滿升用各章程惟思該將軍等此番籌畫均係尋常計議溯查乾隆年間裁定西陲 廟謨廣運妥協周

詳六十餘年邊圉綏靖爾時從未議及增兵亦未議及增官如果
必須添設文職方資治理當日諸臣定當早經籌及詎待今日且
果照所議增設未必歷久之無弊況文職尤非武職可比武職
員弁性情粗率儻或任意妄爲尙屬易於覺察文職各員由內地
調派若年老衰庸者自難任事其年富力强稍有才具者希圖任
滿升遷或致夤緣謀調轉不足以收得人之效況夷回異俗必不
能以內地禮法繩之徒滋紛擾又旣添文員必須書吏此輩舞文
弄法因緣爲奸必致貪婪需索苦虐窮回卽經發覺官畏處分巧
爲彌縫邊陲僻遠易於消弭是內地回子先受添官之累於控制
外夷之道實屬無益而有損卽令得人而任而回疆紛紛添設文
職衙門是儼然添一省會殊失居重馭輕之策亦不值如此辦理
所有添設同知等官雖經議准仍著該將軍等悉心籌畫從長商

酌自以不必添設文員更爲妥善總之久安長治全在撫馭得宜
斷不可徒事鋪張顧此失彼日後轉多流弊以致內外俱困則悔
之晚也○以賽尙阿爲內閣學士兼禮部侍郎銜由哈密辦事大臣遷○丙
辰大學士托津以病免予食全俸○實授吳邦慶漕運總督○壬
戌以鄂木順額劉彬士俱爲左副都御史鄂木順額由大理寺卿劉彬士由光祿寺卿遷
○乙丑諭特登額等奏審訊蔣兆璠致書徐寅第列款詆毀一案
訊據徐寅第供稱松筠前在直隸交卸督篆進京時言及前赴科
布多審案需用茶葉哈達備賞屬伊遣人赴張家口代買伊隨差
家人帶銀購買用銀五百八十兩松筠發還銀五百兩係屬買在
先發價在後覈與松筠原奏不符著松筠據實明白覆奏○丙寅
諭松筠於交卸直隸總督後派赴科布多係審案差使何以率辦
茶葉哈達賞需卽欲自行置辦亦應遣家人購買何得率屬直隸

道員代辦前經降旨諭令松筠據實覆奏又未將屬買在先發銀
在後詳晰聲敘與特登額等審訊情節不符種種錯謬咎無可辭
松筠著交部嚴加議處尋議革職得旨革內大臣賞三品頂帶休
致○庚午諭朕恭閱康熙五十九年 聖祖仁皇帝實錄內載吏
部等衙門會議各直省督撫題裁閒冗官共三百三十六員應照
所題裁汰奉 聖諭口北道缺不必裁餘依議欽此復據吏部查
明以後各省裁汰文職閒冗官員單開雍正年間共裁二百五十
餘員乾隆年間共裁三百三十餘員嘉慶年間共裁二十餘員道
光年間裁汰二員朕詳加披閱仰見我朝 列聖相承激敘官方
刪除冗濫至爲詳慎國家設官分職原以保乂民生必使閭閻獲
益方足收指臂之效若任令冗員濫竽充數其本任旣無事可辦
而各員官廩一切公用不能盡出已貲勢必取之民間是多設一

官百姓反多受一官之累卽如近日徐寅第收受節壽陋規一案顯係州縣朘削脂膏藉以供應據此一端已可概見嗣後若不分別裁汰則閒冗相仍冒濫欲衛民而轉以病民朕心廬保赤非爲節省俸糈起見總期有裨民生官不虛設始足以臻上理各直省督撫及各河督鹽政悉心覈議於所轄文職閒員如有可裁者酌量裁汰據寔奏聞請旨用副朕慎簡官僚勤恤民隱至意○諭前因琦善奏參蔣兆璠徐寅第一案當派特登額等赴直隸秉公審訊業已訊出徐寅第得受蔣兆璠餽送節壽陋規至二千四百兩之多經特登額等按律問擬當降旨照所議完結在徐寅第所屬二府五直隸州四十八州縣旣經收受陋規必不止蔣兆璠一人惟蔣兆璠不能指出實據各州縣僉供並無致送節壽陋規情節並出具切實印結朕亦姑免深究徐寅第在直隸平日居官尙非

聲名狼藉之人而其得受陋規已盈千累百至於此極因思各直
省道府賢愚不等豈盡皆廉介自好之員似此得受陋規者恐亦
不少國家設官分職原以安撫百姓道府大員營私肥己該州縣
等豈能自出己貲無非朘剝小民脂膏以爲逢迎上司之舉實堪
痛恨是多設一官百姓卽多受一官之累非以安民適以病民矣
各督撫經朕特簡具有天良務須破除情面力挽狂瀾嚴查所屬
司道府如有得受陋規者嚴參懲辦以儆其餘不得以狷潔自持
卽爲無忝厥職嗣後各直省督撫固宜潔己奉公尤須正色率下
儻正己而不能率屬則是形同木偶於地方有何裨益一經訪聞
惟該督撫是問決不寬貸○裁古北口外吉爾哈朗圖阿穆呼朗
圖兩處千總副千總並盤山委署千總各二○壬申諭軍機大臣
等長齡等奏訊據自霍罕回之伯克等稟述情形悉心籌議一摺

朕自上年九月派長齡等前往新疆節經降旨不過令設法購綫並未特令向霍罕伯克縛獻賊目送出回民該將軍等沾沾向霍罕要人堂堂天朝轉爲霍罕牽制豈不爲外夷所揣摩其弔噶爾拜一名留之何益著卽遣回儻霍罕遣使來求通商當明示以大皇帝天恩浩蕩爾等如要通商我當奏聞大皇帝許爾仍舊通好其茶葉大黃俱在所不禁從前鈔沒安集延物件亦可發還兼可免其貨稅如此明白宣諭義正詞嚴庶可折其倔强之心而示我寬仁之度該將軍等旣令作霍爾敦寄信卽將信稿遇便呈覽務須得體不可草率至霍罕伯克邁買愛里年僅二十五歲其事務俱係明巴什作主何以所屬夷眾都願通商獨明巴什一人不肯明巴什是否卽係賊目或另有奸謀著密查具奏至所請暫留哈豐阿郭繼昌二員旣有壁昌在彼鎮撫何以又須該提鎮督同操

練惟據長齡等奏璧昌止能居中調度未便出敵著該將軍等自行酌量如必須在彼卽令暫留或辦理善後完竣卽令各回本任朕亦不爲遙制其另片奏各城新添官兵應需糧料就近籌備供支見在葉爾羌城添駐官兵五千餘名糧料倍徙於前請改徵本色如數交納此外不敷糧八千餘石及巴爾楚克新設官兵俟璧昌另行籌款等語該將軍等止顧目前不思遠圖總之添兵不能不添糧添糧不能不採買採買不能不擾累回眾豈不令回眾寒心勢將句通霍罕更難辦理終必歸朕所云內外俱困而後已該將軍等仍遵前旨再行妥議務令壯我國威仍不至擾累回子方爲妥善○是月貸奉天鐵嶺等五州廳及巨流河四處口糧江西南昌等六縣水衝圩隄修費蠲緩甯古塔雙城堡雹災霜災新舊額賦緩徵奉天鐵嶺等四州廳縣江西南昌等三縣甘肅河州等

二十州廳縣災歉新舊額賦

十二月乙酉命富俊爲東閣大學士管理兵部以吏部尙書文孚

協辦大學士調穆彰阿爲工部尙書以那清安爲兵部尙書昇寅

爲左都御史

由綏遠城將軍遷

○戊子轉桂齡爲禮部左侍郎以陳用光

爲禮部右侍郎

由內閣學士遷

○以恩銘爲理藩院右侍郎

由烏里雅蘇台參贊大臣

遷

○己丑諭軍機大臣等長齡等奏詳議善後事宜及會籌查勘

邊界各一招據稱額爾古倫兩次出兵回疆地勢夷情均所諳習

今調補喀什噶爾領隊大臣可期勝任向來回疆參贊大臣總理

八城事務各該辦事領隊大臣及換防總兵均受參贊節制各城

常行事件俱報參贊備查緊要事件俱咨商參贊覈辦著飭令額

爾古倫遵照向例辦理惟喀什噶爾地處極西儻有邊務緊要情

形探訪得實應一面馳奏一面飛咨參贊覈辦並著飭知該領隊

大臣遵照至喀什噶爾葉爾羌舊設回兵各四五百名據稱向來回兵挑補兵額止圖免納錢糧並不操習技藝若能勤加訓練俾自保身家防禦外患更可收以夷制夷之效惟見在喀什噶爾英吉沙爾葉爾羌回眾疊遭兵燹甫經招撫歸業生計尙形拮据該將軍等與璧昌商酌擬俟回眾元氣漸復卽令阿奇木將舊額回兵先行挑補令綠營將弁認真教習操演如將來嫻熟技藝卽可陸續頂補防兵著照所議辦理此時屯田一事最爲緊要該將軍等前將喀什噶爾查出叛產地畝出示招集民人撥種見經璧昌招得五百餘人陸續認耕著趕緊妥爲經理以期寓兵於農實爲經久良策其葉爾羌地方能否招民開墾亟應查看見旣令璧昌親往葉爾羌巴爾楚克一帶踏勘築堡建蓋兵房地址之便詳加周歷勘明卽行會同詳議具奏至哈喇阿暫留回疆應駐紮葉爾

羌或卽駐喀什噶爾著該將軍等察看情形酌量辦理其哈豐阿郭繼昌巴清德德勒格爾桑齊克唐阿及吉林兵二十名著一併留駐交哈喇阿差遣將來隨同哈喇阿回京至籌議查勘邊界事宜據稱邊地幅員固未便置之不問而兵行卡外必須計出萬全此時不值輕出偏師或致別生枝節伊犁巡邊係常行之役請俟來歲屆期由伊犁多添兵力著派領隊大臣照例巡查布魯特邊界令其不動聲色靜密查察如能徑赴吹搭拉斯地方勘明有無夷人興築嘯聚之處卽據實奏聞儻未便前至其地卽作爲常例巡邊整隊旋回以昭慎重所見甚是著照所議屆時酌派領隊大臣一員於巡邊之便妥爲查辦再見在葉爾羌駐兵五千名喀什噶爾前經降旨酌留兵一千名又巴爾楚克駐兵二千餘名烏什一路樹窩子一帶從前齊慎在彼駐兵處所酌派官兵一千名或

數百名在彼駐紮統計兵數九千餘名亦足敷用所需軍火行糧
務須豫爲籌備萬一卡外或有蠢動總要無需內地調兵籌餉方
爲妥善該將軍等當通盤籌畫從長計議以免撥運之勞而成久
遠之道至見辦屯田以回疆物產供回疆兵糈將來挑補屯兵卽
可節省防兵之費所謂事豫則立勿致臨渴掘井該將軍等不可
徒事鋪張總須計出萬全以期經久方爲不負委任○己亥長齡
等奏嚴計兵餉經費得旨兵雖不虛增帑雖歸實用總是分損內
地精華置於邊外之極邊以禦去來不定之醜夷我大清統壹寰
區修明武備凡滿洲綠營分布天下認真教養以固邦基而有天
下若如此長征遠戍卽獲保平安無非代內地回眾看守家園如
有不妥立費周章况重兵布列彼必不來是空竭精力也若守禦
不足伊又逞其伎倆是仍勞救援也更恐日久奸夷探知吾意故

爲牽制使我去守兩難勢不得已必致多加兵力耗竭糧餉於奸
夷毫無損傷試問成何事體又虞久駐多兵將領或失教練保無
騷擾回眾者若內地回眾稍有離貳彼同聲同氣更不可不思及
也是以總須得一外示羈縻暗收以夷制夷之道斯爲至善朕屢
次所降諭旨無非在是○庚子諭儀親王明年八十有七雖精力
如常不宜過勞來歲元旦暨正月十四日宗親筵宴均免其入宴
著管理膳房之內務府大臣屆期頒果品茶穀一席以示朕篤眷
懿親體恤高年之至意○諭陶澍奏江西引鹽滯銷實由粵私侵
占贛縣攸鎮地方粵省開設子店熬鍋日增全行衝銷准地請援
照王守仁之法於贛州淮粵交界之地設廠凡粵鹽之衝入者照
淮課之數收稅卽以其稅撥補淮綱之引課須於贛州收進一步
地方勘明有可攔截之隘口設卡堵截如粵鹽再進仍作私論等

語著江西巡撫吳光悅就近切實確勘地界廣爲察訪可否設廠
試行妥切籌議辦理江西旣議設廠抽稅必須熟諳之員履勘形
勢釐定章程原任贛州府知府陳煦緝私督銷頗爲出力該員見
已起復著照所請准其留於江西交吳光悅差委辦理鹽務○諭
陶澍奏開綱以來淮北止捆二萬餘引較定額不及十分之一本
年將官收竈鹽督商辦運均擇暢銷之岸先行運往以冀早收庫
項而滯岸仍無鹽濟售民間旣無官鹽不得不買向民販竈丁積
有餘鹽亦不能不賣與民販等語著照所請准淮北暢岸仍歸商運
其餘滯岸卽做照山東浙江票引兼行之法於海州所屬之中正
板浦臨興三場分設行店聽民投行購買運往售賣擇各場要隘
之地設立稅局給與照票註明斤數及運往何處字樣凡無票及
越境者仍以私論著陶澍卽飭運司妥議條款酌量試行○乙巳

諭軍機大臣等長齡等奏酌議善後事宜一摺據稱葉爾羌等處毋庸改設同知仍留葉爾羌喀什噶爾糧餉章京二缺令其管理民事著照所議辦理惟所稱僅裁英吉沙爾巡檢一員仍留葉爾羌巴爾楚克喀什噶爾及阿克蘇所屬拜城等處巡檢共四員此時葉爾羌等處既不改設同知所有此項巡檢四員亦著毋庸議增免滋流弊見計各城共添滿漢營官四十五員於喀什噶爾綠營舊額減去官弁三十四員實於西四城原設官弁外僅添十一員各該城邊界共設大小卡倫三十餘處需用綠營官弁較多准照前奏減定之數以資差遣至所稱將來通商事定夷情靖謐即可由該參贊隨時酌量減撤見在添設防兵原係暫時權宜之計既據奏請通商事定即可隨時酌量裁撤究竟如何減撤之處著長齡等再行切實聲敘並詳議章程具奏以免將來藉詞延緩其

烏什所添滿洲營官三員又由喀什噶爾原防額內減去綠營兵三百一十五名移駐該處酌用守備千總把總各一員仍著照前議准其安設該將軍等所保出力各員已另降諭旨酌量分別加恩已足以酬其勞績其另片奏請將革員牛坤扣滿戍限三年釋回之處著不准行○以吳邦慶爲江西巡撫蘇成額爲漕運總督鍾昌爲倉場侍郎特登額爲直隸馬蘭鎮總兵官轉凱音布爲刑部左侍郎以恩銘爲刑部右侍郎奕紀署理藩院右侍郎由內閣學士署○調鍾祥爲江西布政使以潘恭辰爲雲南布政使服闋廣西布政使○調吉恒爲廣東布政使以程喬采爲浙江布政使楊振麟爲廣東按察使由浙江鹽運使遷○是月展賑湖北江夏等十六州縣水災給江蘇上元等二十五州縣衛及丁谿等十五場水災口糧貸江蘇鎮江等二十七營湖南常德澧州各營水災兵餉展緩湖北咸甯等

四州縣衛新舊額賦緩徵浙江烏程等四縣江蘇上元等七州縣
安徽青陽縣水災額賦吉林三姓旗莊逋賦○是歲暹羅琉球朝
鮮越南來貢